


百名家

七十七



南朝
梁
江醴陵中

| | | | |
|-------------|-----------------------|-----------------------|-------------|
| 庫 | 文 | 閣 | 內 |
| 三 四 函 | 三 七 一 九 冊 | 三 七 一 七 號 | 漢 書 類 |
| 六 架 | | | |

| | | | |
|------------------|-----------------------|-----------------------|-------------|
| 庫 | 文 | 閣 | 內 |
| 三 六 一 函 | 三 七 一 九 冊 | 三 七 一 七 號 | 漢 書 類 |
| 二 一 架 | | | |

| | | |
|------|--------|------|
| 內閣文庫 | | |
| 番號 | 漢 | 3717 |
| 冊數 | 99(67) | |
| 函號 | 361 | 51 |

共百九冊



具

中書郎謝朓

謝朓


宋謝朓臨恩微交鏡指然擊真冠履進道
 汝穎之金或揚采於四亮江淮之珠已馳光於
 七貴昔保不妄美第豈虛立未有使懸湘野蒙
 送口之賞工謝絲翰獨歸風之價臣切乏筆刻
 於深固火智軍劬官志隨從政左遠求振風于
 是凌雨不借遺社鳴之陽際河清之會立雲葉
 實若駕蓮葉白雲曉綺成棠解逐仕甄物任

表

拜中書郎謝表

淺草文庫

榮鬱兩臨。恩倣交鏡。悄然擊菟。迺懼迺逝。臣聞
 汝穎之金。或揚采於四豪。江淮之珠。已馳光於
 七貴。皆聲不妄美。第豈虛立。未有伎慙湘興。蒙
 送目之賞。工謝絲輪。竊歸風之價。臣幼乏篆刻。
 長睽圖史。智罕効官。志闕從政。方遽求振風。長
 憂。凌雨。不悟遭社鳴之屬。際河清之會。玄雲素
 霞。必駕蓬萊。白毳駢鱗。咸蒙解遂。仕通物任。官



登郎掾。此實耀靈之私照。而微臣之厚幸也。仰惟皇衢大融。氣品呈觀。西傾棧山。東鯤航海。故奇士端威。異人罄拆。皆相望北闕。待詔南宮。而臣學無利博。文有伎害。迺影裾頓屣。伏黃扉之右。曳纓轉笏。居青璫之前。訪德於姑射。聞道於崆峒。伊臣之願。過爲信矣。管望鄙才。麗爵乏上。班長岑聞。靡身終下秩。愚臣方古。悠然已泰。內燭徘徊。眇不識屆。

○拜正員外郎表

臣邁鄉遠迹。由學末徒。不瑩雕龍之采。寧照玄豹之飾。自過被光私。濫蒙恩幸。屢度經冬。亟移春序。皇緯如紐。慙飛塵之効。瘖基方峻。謝寒露之勤。故宜伏影軒間。卷氣衡下。猶蒙供事紫楹。奉役丹殿。巡魄擎概。榮渥不暗。震離徹邃。阿景洞幽。復昇官清閨。列版嚴闥。敢識何算。爰忝叔則之仕。菲質焉樹。迺謬仲容之職。猥枉青釭。增光空質。心據末塵。情慙洞戶。佇首矯迹。以銘以奏。

○爲建平王慶明帝疾和禮上表

臣聞慶動至玄，則昌衢敦序，教乎上雲，則紫寓交泰，故祈寒溽暑，無以變其和，沴火凝陰，不能徙其氣，伏惟陛下，至德遐穆，實天縱聖，仁鑄蒼岳，道括寰海，故丹陵之君，欵金泥而謝賢，媯墟之后，眷龍圖而慚德，頌聲蔽達，歌思匝道，而望景暫虧，輪光少曖，玉牖違和，金幌輟念，百祠未遑，四嶽匪處，吉蠲爲慶，神御方休，瑞廣文齡，祥深武日，具惟涵教，欣愉兼薦，臣班戚奉慈，實自慶舞，不勝悅豫之情。

、建平王慶安城王拜封表

麗采繩河，映萼璿圃，淑問夙孚，令儀早晰，撰告候辰，昭膺輝序，國維富禮，皇塗凝衛，具生屬慶，懷識戴躍，臣涵悅楚邊，魂馳關闕，不任下情。

、建平王之南徐州刺史辭闕表

臣過承寵靈，閃點暇日，徒抱皇慈，無充橫草，而品第廼崇，軒服逾峻，顧茲覲躬，彌覲荒昧，今便奉官外甸，卷迹徐山，託慕宸嚴，載惟感戀，哀疾

不獲請闕。不任窮鯁之情。

○建平王讓右將軍荊州刺史表

茂寵迺臨。炫奪彝典。巡恩鏡飾。攪情震慮。臣聞該秩詔序。匪賢莫能。孚其職端。維裂陝。非功無或濫其選。所以輪鞅國典。締結民紐。五威咸平。四精或訓者也。臣踐行迷方。試業做緒。徒以綴采宗莘。承渥帝席。執圭戴筆。亟荷出內。至乃曳組河縣。茂馴羽之化。鳴環京轂。謝擇鱗之政。聲績兩無。風化雙缺。而龜紐未剔。璽書頻降。復改

冊湘區。分瑞衡服。竟無賈琮。交部之廉。終乏郭伋。并壤之信。固以雜沓民明。湫隘身諷。不悟皇靈再輝。河海重渥。遂踰恒采。妄賁異等。荆門務要。方城任積。水交沅澧。山通岷峨。襟帶百縣。縈抱七州。上德懋勳。勘居斯地。寧臣膠固。所宜膺荷。是以焦薄。覓色驚迫。心影謹刷。睿情置露。弱志伏願。陛下停旒弛珙。暫炤瑣曲。則鑄才式。弘練物惟遠。王度旣清。蒙識以泰。不勝慙慙屏營之情。

爲蕭驃騎讓封第二表

臣某言寫瀝愚丹已續前表猥降前詔未垂鏡
恕一省驚慙再悸竄府靜躬自察啓居匪地臣
聞日薄星迴昊天無以爽其節山盈川冲厚地
不能虧其度豈不靈鑄有限神極無爽况世道
恒淪人彘剽奪數滿必泐虛飾小故亂大臣才
非古賢任鈞左戚祚開山河兼金疊組爵侈常
班寵溢前達以榮以渥且慙且覲雖嘉銘鼎之
恭更懼循墟之速矧乃三司業貴上將地崇惣

錄務廣河汾寄深珪寓方啓劔衛增肅旣驚朝
野足震城邑殷周富士猶難其人漢魏多才亦
罕兼職且麟閣之臣尚有位不及鉉全器之侯
猶或任不並台名爵無假前世之雄規車旗勿
濫中葉之英軌况鴻誥鬱集懋冊頓菜諒非虛
薄輕所膺符今殷夏旣聲封國式固故天地燁
耀日月更輝陛下停若鏡之明流如雲之愛方
求士於版巖宜思賢於屠肆而私臣以闡廟寵
臣以惟鼎位兼文武職惣內外非所以發夢涓

濱儲精河藪鐫金刻石既不可詮興歌里誦其
謂臣何仰緣大道方行蒼祇宅氣威靈所燭九
功咸詠寧於庸臣獨隔恩耀誓守愚衷重扣雲
日如蒙恩宥實生之幸不任慊欵之誠

○爲蕭驃騎讓封第三表

臣某言臣再抽慊請辭爲理屈側守圭漏伏望
衷鑑而宸緯嚴秘襟棕徒懸優獎之降非復常
旨肅奉驚懷曠曉如失臣炤冊訪古誦史稽筮
以爲敷道之寄管物成務惣錄之重匡績毗風

莫不下協河岳上踵光緯先王所以長世後睿
所以字民纘金圖之要輔樞曆之機者也臣本
瑣姿不慕聞達筮值英世頻遘時來感激光私
未能自返烏可超乘厚任妄據高圖天道旣平
鬼神好謙臣亦何人而獨斯處所以不恤色忤
頻犯鴻威者正以方圓之景已滿丹彩之色難
加政能緯俗匪務傍職坐而燮道必在其人若
臣武未屬橐鞬之分文不藹樽俎之間德非時
秀道乖物宗虛飾疲伍空貽上位則天變彰於

飛流地肯見于震壓驚蕩民聽蕪沮物議綸言之出不追金石之謬已遠豈唯敗錦傷經毀鼎覆餗而已哉自非西京上績東都名勲河右群賢江左諸彥寧有誣叨天爵以爲已功者也管南楚偏君鄢郢小政執珪柱國尚不輕授况車軌共文四溟同宅而以鄙蔽超居金鉉殊任鬱起臣心憂魄悚視丹如綠伏願陛下暫停冕纁少察愚實鑒臣覩情愍臣孤志廣天下之惠可匹夫之諒則國步永清門下永無謬悞不任憂

駭之情

○爲蕭驃騎錄尚書事到省表

臣某言臣自妄蒙異寵輕荷殊爵晝昃猶聳夜艾方驚誠以設器瑤陛取監冲滿懸魄金波徵驗虧闕茲乃天數去盈人經好退后所以裁成萬品下所以各慎百司未有違才易貫克負永業者也且量力之誥實焯前書辭科之誨且昭管牒况臣徒竭弱質忠貞未對猶叨今恩山岳非重故慙屬交喪頻煩表疏必謂巡崖之慊不

忽俟河之清可期。不悟皇明神邈。鴻獎彌深。雖守丹愚。競絕蠲恕。今輒耀纓上序。鏘珮中軒。德輕施重。左右生華。志盡輸謝。終愧報効。不任下情。

○爲蕭驃騎讓豫司二州表

臣某言。臣傾心駐氣。不蒙睿感。憂讐交鏡。中寐再驚。臣聞國曆惟耀。則藩伯緝其才。朝緯伊序。則方率司其度。用能瘠紐。弗虧民教。可變者也。臣自少器業。無聞弘大。誤變燕鼎。超憑吳舟。託

翰負組。假翼要瓊。質圖玄素。文寫青牋。爵富諸公。任高群彥。銓梁旣失。輻誦所湊。雖反影毗道。徇身贊德。朝微不昭。民聽具溢。豈非性力知限。鑒度有崖。乘茲而處。猶懼忝辱之耻。况此以任。何堪湧溢之賜。且董督條興。皆非盛古。至乃河襄初授。或體兼上才。江表廣任。或功爲物首。臣績陋於國。不勤睿朝。寵集若是。非所克取。終抱寸襟。重露愚見。伏願天鑄廣裁。地靈厚載。特垂蠲渥。使不矜盈。則藿質蓬性。庶無矯奪。不任匪

晏之情

爲蕭驃騎上頌表

臣某言伏見明詔鑿與便御親六師臣又謬惣
群帥竊聞金火告燿昏明代卷雲電漑湊經綸
相襲所以草昧縣寓昭晰區宙况乃逆徒阻兵
罷掩西服雖蟻衆鼠竊勢必褫散然尋仍難貸
原煙易滅臣受算內楹稜威外闡按甲視夕沾
襟待旦翦此凶渠庶匪曠旬但遂玉輅躬臨雲
蹕親駕悚慨交心實百常憤今便嚴率所統尅

此月二十六日出次戎郊故已望江源以軫歎
想荆山而增厲矣進止之宜更聽勅旨不任悚
企匪寧之心

爲蕭驃騎謝慰勞表

臣某言即日侍中秘書監臣戢至奉宣詔旨慰
勞便受轂中帷練甲外壘旌旄蔽景輿徒競氣
人懷秋嚴士蓄霜斷晦奄已掩氛豎未懸稽鉞
竚威寢興震慨今玉人臨郊皇華降庭輝燿望
實將激威武戴鵠之夫迎光蹀恩投石之師攀

炤竦惠楚續越醪。方茲慙潤。臣忝屬聞私。彌抱
渥洽。不任下情。

爲蕭驃騎慶平賊表

臣某言。狂賊沈攸之。棄天犯紀。毀禮滅緯。外陵
南畿。內曩西夏。稟血涵氣。咸百離憤。賴皇威遐
制。睿圖廣馭。四海競順。其會如林。仰綴宗稷之
靈。俯輯士民之効。故嚴勅裁交。妖鋒折首。凱期
旣屆。樂飲在晨。斯乃紫曆方永。蒼氓同慶。臣備
符寵私。時深抃舞。不任踴躍之情。

爲蕭驃騎解嚴輸黃鉞表

臣某言。逆沴電熾。凶妖霧舒。志大禮天。情已類
社。故乃馳羽江郊。驚燧山甸。雖藏智審。其黥戮
涵識。判其奔沮。然兵扈難輕。義險宜備。故膺寵
無辭。奉鉞不讓。今元凶旣殪。醜徒自紊。朝靄方
卷。郢氛已廓。樂瑄登肆。禮衣曳朝。不宜復假殊
服。取缺彝則。輒上還王府。永戢祕館。

爲蕭驃騎讓油幢表

臣某言。奉詔賜車一乘。竊以國容方穆。旗章式

序朝禮永清儀服咸貫故象革建鏡尚烟周圍
朱箱玄蓋猶炤漢篆皆旌羽勿差功庸匪濫臣
忝爵山重蒙榮海深襲恩祇冊已慙初筮浮祿
素位方疚心路鑒古以惕巡世罔然不宜假文
丹幘空飾阜輜仰思至道俯恤物僭伏願聖遠
特停華渥書愚上請追深累懼不任下情

、爲蕭驃騎謝甲仗入殿表

臣某言臣卽日被勅賜給甲仗五十人入禁儀
武殿飾冠疇典局荷此盛恩五情銘載臣聞國

之利器在祀與戎蘭綺之設實允儲方故官騎
辰居羽林天部瞰城龍塞言伏鬼方臣股肱之
力不足以染丹青橫草之勤寧可以鏤金石而
魚服象弭一旦虛授誕錫金珪方茲爲絢黃河
如帶比今非賞故異寵之襲心魄共驚不世之
服蒼祇同灼雖攀靈河漢駿奔明哲慙迹駭衷
無情以處

○爲蕭驃騎讓太尉增封第二表

臣某言以鉉司崇貴袞位淵嚴非德非功無忝

無溢故誓魂肆請舒衷仰謁不能曲流慈炤遂
乃徒洽恩獎周覽未交靈爽以懼臣歷古公圖
循遠訪繪未嘗不麗選袞台妙簡槐采者也魯
鄭之賢戚曹蕭之勲彥吳鄧之盛功王鍾之素
業孔明之居蜀茂弘之在晉僉曰伊人是以處
無懦色臣官逢昌世運漸時明頻煩紫渥綢繆
璿命身薄施厚感厲愈深遂負機繩之託猥集
衡梁之任風軌不樹微猷罕宣無以式翦寇兆
載弭姦萌致虹沴阻於上京蚺妖扇於下國實

賴藩伯鞠旅侯甸入守攬捨旬始煙祛霧卷故
皇道威稜之由神緯昭昌之効臣豈有探賈察
幽之智攻城野戰之力哉今迹無小功事貽大
賞愧寤終朝慙夢流夜咨此庸弱何以任忝伏
惟淮泗猶梗趙魏未賓中原久蕪神州方翳思
樂盛猷願厲聲頌將陪雲驂以非狩扈朝服以
濟師乃爲少雪庸誠微謝天眷耳寧容遽竊茂
爵輕頒鴻名者乎伏願聖渥遐覃賜以矜宥需
焉垂仁穆然惠德血祈旦亮慊志夕滿雖蹈疵

戾猶深抃躍

、爲蕭驃騎讓太尉增封第三表

臣某言撰心求私精衷請亮情不感神理無動天詔飾旣降辭表是絕朱綬方臻金鉉未宥魄慮再馳詵然改席臣局志久戰淺槩已領具煩寸管備黷尺史曠旬浹景祈指遂宜猶謂設品分職實以仰銓璧緯列寵縣榮故乃俯酌瑤陛迹聯盈缺道協興降上睿所以僉舉前英所以詳能今若第隨私貴爵與私富紊蕩邦經斷折

民紀豈可還風中葉。逃聽遐代者也。臣才乏往賢績謝古烈妖鋒孽火將炎天地幸郊甸或靜江山以闕文軒華劍旣榮旣峻侯封桂食又盈又滿祿高誚厚任重責深弱節兼誠誓思不淺伏願隆慈特垂明愍臣奉國猶家慮公若私秉軸之鈞心希在治不任懇懇之情

○爲蕭太尉上便宜表

臣公言臣聞經邦緯治去華爲急體國字民循素乃安聖誥遺風具騰丹冊賢言流沫備宣青

史何嘗不翦削浮奢。銷遺文繪。然後頌音載興。澤洽式廣。楚駕百馬。民雜國彫。秦修萬騎。教亡業墜。刻桶丹楹。禮有常序。朱轡皂蓋。古無濫秩。縹衣綸綬。漢置前制。奇服怪物。周設常刑。皆節俗約訓。反樸還風。肅政黎心。釐一民志。故禮奢寧儉。宣尼之高風。以義止利。孟軻之宏規。若乃文彩利劍。道鑒其元。雕蟲篆刻。世炤其淺。雖儒墨異學。名法各治。至於遵本捨末。其槩一也。故荀韓之立典。管晏之制書。賈陸之鴻筆。嚴徐之

博辭。食貨興志。鹽鐵生論。莫不異說而同儉。乖議而共治。然世淪物起。道缺事遷。蓋源起西秦。波被東漢。一魏不變。二晉未革。所從來者遠矣。洎高祖武皇帝業。高縣寓化格。區宙菲躬謙度。方追重華。納麓之勤。約情撝操。乃取文命。卑宮之義。去金錦之巧。無帷帳之飾。唯修遠圖。綏國之術。祈勸力耕。濟世之規。是以政平刑偃。紫階斯廓。太祖文皇帝。恭已明臺之上。聽政衢室之下。九官咸靜。萬績惟凝。亦復務抑華詡。思裁參

太輿馬翠翟之麗。尠登乎外禁。瑤碧綺組之玩。罕設於內宮。故大德立而五路謚。鴻名建而四民寧者也。自頃政教日替。敦教月虧。誰惟歷稔。亦曰淹紀。至乃帝臺傾海外之寶。王城盡天下之秘。象席珠履。一躡而卽收。鏤琴綵瑟。再撫而已損。聚衣隨塵而罷。羅袂從風而棄。百民染其聲奢。萬姓被其馳蕩。故闐闐之里。富者竊梁楚之乘。伎巧之家。豪者襲王公之服。於是有文靡虛麗。驕邪不典之器。精織空飾。妙蠶非常之玩。

農夫勤耨。不克浮伎之資。蠶女務織。無給黠刻之費。將恐去實就華。未知所屆。背源從流。不識其止。求國富兵強。寧可得乎。今江南所宅。止漢魏兩州之地。戶口所檢。裁文景三郡之民。舊齊故魯。鞠爲茂草。全趙盛魏。豺狼所嚙。陛下方欲鳴鑿中土。朝服濟河。不改斯術。則未見其可也。臣謬屬大任。竊同憂泰。日晏宵分。實忘饑寢。草治其莠。職此爲先。輒具條便宜。可以安邦利民者。事事如右。率以聞見。謹簡聖聽。若其咸允。謹

請勅付外施行

○爲蕭讓太傅揚州牧表

崇絕之寵降自白日殊甚之禮墜於青雲祗畏
驗盛若奪魂鑒巡席無容當軒改色臣聞天地
之大德曰生聖人之大寶曰位將以啓廓靈緯
崇樹神紀百司備列貴賤之分既炳九官咸贊
升降之際可明故皇極不爽國步斯泰雖金媯
各政姬華異治未有革序變倫而能流英發耀
者也臣才慙右賢功愧上烈平趙夷魏之氣無

宣於國書濟河登山之威未亮於左史旣罕龍
韜金匱之効又乏楹間帷中之績衛主寧謂提
橫流匡危不足生細民故小節時顯於艱難大
勲無紀乎廊廟而乘輅服冕荷蕭張之賞開城
裂域受曹鄧之爵不能翊教緝政釐濟氓隱贊
邦弘化飾整朝輝是以德少寵多與人立規才
薄位厚處士興議故玉燭未調道治猶鬱者臣
之爲媿也不悟陛下復停日月之華凝煙露之
潤擢臣瑣姿鑒臣陋誠前恩未曠後寵已襲上

公祕鉞聲振都鄙。文劔雕鳥。禮殊軒殿。深褒之
逮。方今爲絕大賚之降。比古爲超。臣亦何功。當
處斯忝。復願道邈先帝。理鏡衆寂。被氣順方。涵
生獲慶。特輟策書。時停鴻冊。則人歌僉平。物抱
至歡。

○爲蕭重讓揚州表

臣某言。臣以功狹賞峻。世誥所譏。才弱寵隆。道
經所諱。故寫覓誓。瞻庶留天矚。圖驕慮滿。護守
私吝。不能青蘋引風。陽燧要景。復降綸冊。徽采

兼明。影迹交戰。水煙相薄。竊聞周夏異章。玄素
各禮。儒道二宗。名墨兩教。咸以裕俗爲急。僉以
得人爲寶。於是尊官上品。乃貽玉振之賢。鴻等
懋列。爲取金聲之彥。或有濟世夾難之略。輝燿
內區。導江疏山之勤。纏結中寓。深德衍溢。大功
振驚。然後超居國右。鬱處朝端。故九職惟宣。六
典式序。內青所以傳其藹。磬管所以揚其音也。
臣才蔽識淺。非集譽於鄉曲。榮降寵臻。乃假翼
於皇極。遂事等話言之寄。任鈞負圖之重。職愆

表裏地聯機務位班昔良知闕前脩居官不聞其風處秩焉見其政寰域之治未緝街縣之訟方興繒販之士無薦管庫之家寂寞四維不聞五教罕敷安可以底慎財賦交正庶士者也今輟和毗道仄身贊業尚據晦曉獲毗璇圖况異禮更飾衰命復崇名超列辟爵擬羣后上仁居之猶涵慙德臣實空儒伊何以勝既誣人文將黷玄緯凌歷飛流之青懼失正和晦裂蜺霧之災且濫世物臣是以寤寐永歎憂國慮私者也

伏聞陛下裁天賦品制地平施使曠世之典不遂臻於末躬迥代之軌無頓被於茲日素心丹魄皦然靡疚矣不任憂迫之情

○為蕭三讓揚州表

臣公言臣再辭非謙重讓靡飾實以爵高中世歷古所難寵冠上台縣代誰易詳圖辨箴如鏡如水檢崖覽志匪雕匪文竟祈夢請駐心挂氣陛下猶降以璽書之榮被以丹碧之采頓然變容一慮九逝臣以為寒暑繇乎平分晦明驗乎

天道咎譽起於微薄得吝生於小疵。故金衡既陳錯髮之異必縣銅墨咸設分撮之殊已傾。聖哲不能爽鬼神莫由避况臣鄙槩早盈陋才久溢第超庶后禮絕羣班仰贊東序之寶平參北宮之政窮盈極滿於斯爲甚鑒茲隆替淵冰非譬所以坐洞房而不悟下輕帷而嘆息也。古之馭教當有道焉量能而受賞撰智而錫位深乃裂組遠故分珪前人以爲稱首昔賢以爲美詠自非上德橫乎天地高績格于區宇烈譽馥於

一時茂名鬱乎當世者豈有降今日而莫先哉。臣爰蒙殊寄六稔遂交及荷忽任二耀忽周未能塞謗生民獲免僮訟何盛勲之足題詎深烈之可銘乎。而因委忝濫踰溢倫等朱軒躍馬光出電入貂冠紫綬寵靄霞炤臣聞闔宗奉國猶非報殉方將身侍鑾華雪齊魯之侵地手執羈之驚燕趙之遠郊然後追迹范張濯纓汾射臣勒志也華爵盛典非所敢寧伏炤古巡將流聖察無使匹槩血誠不諒於璿宸宏芬英猷遂蕪

於里聽。豈伊庸臣。獨蒙其庇。亦曰海隅。咸被其利焉。

○爲蕭太傅謝侍中敦勸表

臣公言即日侍中臣惠基給事黃門侍郎臣僧珍至朱蓋乘雲。玄軒肅霧。墜高天之旨。集微臣之軀。神爽矍然。斂影無地。臣初長血心。未啓素槩。辭從意空。言隨事盡。不能降陛下一時之恩。借俄頃之炤。遂枉近侍。貂簪軾庭。臣自亮無庸。何以集此。退咎慊誠。悲在垂光。進戒朝訓。虧茲

盛序。感慮躑躅。榮結夢寐。臣檢古少例。巡今逾疑。豈有妄叨天功。虛竊上賞。近謬國華。坐取隆貴。人見其過。外惜皇猷。內畏私青。昔西京鼎秩。漢世權家。丹墀網戶。擊鐘連騎。何嘗不以驕滿貽戾。謙冲要福者哉。臣不能遵煙洲而謝支伯。迎雲山而揖許由。激昂榮華之間。沈潛珪組之內。光飾旣超。寵靈亦遠。江左已來。罕見其倫。今位冠朝端。通侯萬戶。結象弭於前衡。奏金管於後陣。都野宗其榮盛。視聽驚其炎貴。臣一旦居

之誰以爲不忝者乎。而陛下猶崇以異禮者。是增臣之戾也。况復肅延華勸。實深窘迫。伏願俯矜單志。賜遂前請。則世寢橫議。臣蒙緩責。

爲蕭重讓尚書敦勸表

臣公言。臣五寫丹翹。宜蒙凝炤。一降王人。遂無蠲察。復遣尚書臣岱兼侍中。臣與等奉宣慈靈。重賜勉誨。鏡伏迴環。憫默失圖。心魄交據。淵谷匪譬。臣自初被詔。迄于今時。載慙載疑。以悚以厲。豈非深懼鴻典。永憂未躬。故琴瑟徒鳴。不傳

廣樂之響。燈燼空舉。焉續景星之耀。何則。卓乎小者。不足以任大。守于蔽者。不可以語通。臣器乏淵源。識暗機務。倫濟夷險。每憑璿曆之遠。龕拆氛蜺。輒資羣才之効。臣寧有採奇鑿隱之能。網國提民之功乎。不謂過延渥洽。謬攀河漢榮宗。益益寵華。晬映藉聲。探議共知其幸。况傳保之崇。殷周特貴。牧司之寄。魏晉稱重。上昭妙德。次擬英勳。有踰茲序。豈不紊裂。今陛下方闢金門之聽。調繡辰之政。何得去禮廢雅。近於臣始。

既無前章孰表後世臣才孤位峻待罪無日矣情哀理感事盡於斯伏願一運天景微見藿心則物不逃形臣何恨焉不勝焦憂狼狽之至

爲蕭太傅謝追贈父祖表

臣公言即日兼謁者僕射姓名奉宣詔書追贈臣亡祖某太常卿亡父某爲散騎常侍特進左光祿大夫寵輝泉扃恩凝松石奉渥銘心祇光慟慮臣行阻祇玄躬早荼棘如劓之痛晷日不追終身之恤霜露彌感雖慙曾輿喬木之敬實

抱仲路華轂之哀自謬藉珪金空貽組紱爵侈於公祿盈於私何嘗不靜欵其結默慕交深不悟睿孝動天昭性曠古惠被遠紀澤演慶世丹情靡諒峻冊愈凝大榮集身尚驚異施况寵洽山柏特振殊造銷骨瀝命猶不勝謝不任鯁泗荷珮之誠

○爲蕭讓劔履殊禮表

臣公言近仰謁威靈辭移理奪故欲冒忝傳識必避殊禮不悟復疑令詔雕飾非常鏡睇未周

金火交慮。臣聞寵以昭賢。不濫才外之華。榮以麗身。豈謀分表之渥。哲后所以僉授。貞臣所以慎荷。故行珪行玉。尚無輕頒。一爵一號。猶宜詳品。况劔舄升陛。贊唱異儀。殆爲對越神體。抗禮天極。漢魏舊載。唯斯稱重。雖英袞遙朝。賢武滿世。蒙此典者。乃曠古時降耳。諒由功饒賞結。名高器深。金蟬綠綬。未足藹其采。瓊珮朱紱。不足宣其榮。方加以履殿。優以勿趨。雖至第爲上公。貴爲皇王。佇望茲禮。猶邈如也。臣何燁業。寵兼昔人。受以懼覆。悔豈有及。復聞殊旨。增其憂。抱此愚款。以賓爲請。伏願天鑒。順臣所守。則雖歿九幽。傳榮萬葉矣。

、、爲蕭太傅讓前部羽葆鼓吹表

臣聞國容軍禮。旌羽昭其華。品騎第乘。鸞鞋藹其飾。所以炎耀仙都。崇麗神境。世教以之垂彩。民聽以之流文。故勒岫銘海之功。鞞革寫其詠。龕難夷邦之業。簫管凝其聲。朱鷺玄雲。旣錫上德。華山芳樹。以頒奇勳。爰及台賢。位高藩戚。名

公恩炤寵垂私賞。皆爲發吹後陣。豈曰兼奏前
軒。茲典罕行。此禮實曠。臣竊服已弘。叨光無限。
才局秩遠。常銜焜耀。安可二葆同整。雙弄頓驚。
覽躬惕然。特貽厚謬。伏願明燦日月。靡忘情鑒。
將停盛飾。遂臣慊心。則涵惠旣饒。恭錫多矣。

爲蕭太傅謝輿駕親幸表

臣公言近以神輿將降。昌啓丹辭。重被還旨。未
垂闔允。謙尊彌光。褒優愈臨。慙疚旣積。敢忘謙
請。臣乘幸藉私。豈曰無僭。攀霞鏡月。非復常所。

此必讓德。信在於茲。但恩嚴交泊。固守莫從。免
默恭典。伊榮加戚。寧容爰枉鸞駕。式驚臣府。訪
心驗已。諒以不夷。求物校迹。誓無此義。且古今
異飾。紫青變禮。取諸臣躬。未覲其安。伏願陛下
賜止冕輅。時停雲駕。則俗踐知方。臣蹈厚泰。

謝開府辟召表

臣公言近被詔旨。賜令臣府自辟僚賢。竊聞治
以才爲寶。教以人爲貴。激風揚糴。實資山東之
英。凝華重馥。良在關西之彥。近以闡耀世經。發

麗朝序而州策郡聘。茲禮尚堙。台召鉉辟。斯文
亟賤。豈非盛美難嗣。故曠寂先芬者哉。臣謬贊
國機。職宜冰鑒。未能澄形炤藝。薦品任官。既乖
覆業。彌感深寄。仰屬皇心。遙覃察政。洞俗弘此
懿典。崇臣遠寵。輒仰睿恩。謹宣巖壑。庶幽居之
士。蘿薜可卷。奇武異文。無絕於古。

爲蕭上銅鐘芝草衆瑞表

臣公言。臣聞象際玄通。豈以明昧。岨運幽崖。遙
鏡。不以人靈異謀。威書壁誥。旣信其綵。綠鱗丹
字。彌驗其文。是以業藹鴻經。則煙露呈炤。精昭
景緯。則川岳發華。故寶鼎白雲。瑞集軒世。芝房
赤鴈。祥委漢年。玄石鴻鐘。遠炳晉室。玉璧彝器。
近耀皇宗。自大明乘規。泰始壘矩。朱髻素毳之
至。史不絕書。奇葉珍柯之獻。府無虛月。今懋曆
啓圖。靈基再固。頃歲以來。禎應四塞。近獲豫州
刺史劉懷珍。解稱所統建寧郡。建寧縣昌村民。
於萬山中採藥。忽聞異響。從石上得銅鐘一枚。
長二尺一寸。遠象古鑄。近乖今製。又州界之內。

樹生連理二木，隔澗，膝枝相通，越壑跨水，合爲一榦，方之舊說，彌復爲貴。宣城所統臨城縣山中獲草一株，交柯攢莖，紫蓋黃裏，貞潤曄曄，自然天華，採輟歷時，質色不變。

炳據有徵

近獲吳興太守臣王奐云十一月二十九日解所統長城縣令臣張搗解稱其月二十五日甘露降縣東界下山之陰，又東太守臣腦解所統武進令臣紀法宗云十一月十日解稱其月二十四日甘露降於彭山松樹，至九日又降如初。

臣以祥緯雜沓，星燭波連，斯乃靈迹深覃，睿衷夙感，理應寫順，祗無涵秘，稽往徵古，僉欣升泰，瑤光日闡，玉繩永休，謹拜表遣兼長史參軍臣姓名奉銅鐘芝草以聞。

、爲蕭讓太傅相國齊公十郡九錫表

非常之冊，分天而降，冠古之典，開河而出，遙然以慙，竟交象魏，臣聞日月權輿，二儀所以克靈，君臣設極，三統所以式固，惟生與位，謂之大寶，辨諸文而尊卑既炳，觀羣龍而貴賤可正，雖復

殷因於夏，王資於帝，至乎建侯分職，體國經野，其揆一焉。是以二周之始，山河逾廣，兩漢之初，封賞彌盛。然表東海者，實牧野之日；瞻魯邦者，乃負圖之辰。西都英相，信命世之功；關中上宰，亦龕亂之力。秬鬯彤弓，本西伯之賞；虎賁戎路，又晉公之典。若乃衣裳盟會，九合一匡，猶慙德斯禮也。臣實鄙才，靡識大體，徒以忠貞爲槩，而勞不足銘，雖以丹素爲誠，而功無可勒。豈有經天緯地之略，探隱炤寂之智哉！抑亦何術以堪盛休，是以覽雲際而懷古，憑軒楫而未寧也。伏惟陛下，神華馭世，理無不鏡，賜臣待謫，今職守其私滿，則天下有道，庶人不疑矣。

○爲蕭讓九錫第二表

臣公言：臣近厲心罄辭，寫情畢議，眇望神藻，鑒見丹襟。而帝閣以秘，綸誥方明，中外卷容，左右軫慮。臣以爲麗天秉經，君上之彝憲；儀地執緯，臣下之恒軌。故皇極載凝，庶士交慎；昔者重黎効官，裁居炎冥之職；羲叔能任，方掌日月之序。

至乎御龍勤夏。未聞冠俗之爵。大彭翼商。豈見
超世之典。以古先哲后。如茲之慎賞也。臣乃謬
貽國寄。志在靖難。若夫野戰虹蜺。伏順者易爲
威。城攻鯨虺。奉國者理必全。雲氣薄蝕。下民咸
貴。更明恃險。輿馬舟中。皆可異議。故昌邑有歸
邸。吳楚無旋師。斯激芬楊。蕤物同其幸。焚惡去
醜。世共其庇。實爲仰憑俯順之効。臣亦何力之
有焉。竊謂祿爲十郡。必俟禹迹之勤。錫以九命。
乃須周公之美。况呂梁不鑿。而器重玄珪。越裳

未獻。而賦擬千乘。京關識其崇貴。畿服知其忝
冒。鏡前修而慙形。覲往德而聳慮。畏崖之請。取
譬深水。審量之祈。呈炤皦景。伏願陛下遠率雄
範。近覽英規。憑霞停詔。臨風輟恩。豈伊愚臣。方
被昌化。具日遺氓。咸蒙其賴矣。

爲蕭謝百僚敦勸表

臣公言。臣欵誠素履。頻載縑翰。天飾高獎。累降
史筆。即日尚書。臣某等。至重宣詔。旨猥辱百僚。
省睇未交。心靈已悸。臣聞良宰謀朝。不必惜威。

貞臣衛主。修已則足。故驕滿之失。取鏡函關。謙
側之美。見炤伊闕。臣本庸人。識無遠度。值開闢
之辰。遭撓捨之運。奸回內鬪。則戮力瓊都。諸侯
放命。則抗節瑤祀。秉號仗義。幸不辱威。皆爲冕
旒。遙鑒之明。羣士畫圖之助。臣寧望伊摯叔旦
之爵。呂牙申甫之賞哉。方欲謝簪東都。濯冠汾
陽。不悟盛禮華典。復臻於茲。靜默迴環。祇畏躑
躅。猶謂遇聰明之朝。當時雍之世。陛下詠堯風
之化。歌卿雲之詩。日月華采。萬方獲性。豐慮仰
祈。必蒙題品。而威嚴竊絕。斯冀遂阻。鑿與玉駕。
復許敦幸。重臣愆悔。無地自安。便當謹恭鴻命。
竭身爲限。

○蕭相國讓進爵爲王表

臣結慮歸請。三辰未鏡。傾竄仰視。九天彌阻。重
炳徽策。再晰光誥。理晦情震。若涉巖淵。臣業不
出世。績未逮古。謬藉明政。陳力就列。艱多智寡。
翊贊罔樹。若乃洪範不脩。鍾繇旒之日。九黎亂
政。當摧軸之辰。雖瀝命奉時。禍提下亟。防明之

陋。貽慙昔人。杜險之蔽。取愧前英。故十萬之師。無集豪街之邸。千金之貴。恒單白藏之府。戈船發於江湖。戎車出於石城。然後雲徹席卷。虔劉巨禍。臣實慙焉。不悟上賞亟降。華爵必集。雖延首紫局。翹意辰居。執爲守約之志。旣謝簡鑒。避賢辭智之請。終無開允。故受任專征。遠邇知寵。肇封四履。侯甸推禮。昔虞思勤夏。不列殊物之錫。晉叔匡周。豈頒上公之典。燕藩懿親。裁蒙袞烏之榮。梁國戚屬。方忝旌旗之貴。而臣包括庶揆。物納儀刑。蓋出近古。非三代之遠體也。乃踰九命。爰超五等。域中之稱。麗天作則。探情顧抱。豈所允安者哉。伏願陛下。一檢丹崖。遂臣慊心。無使休迫。深貽疵戾。

爲蕭相國拜齊王表

臣無佐夏匡殷之功。威晉服楚之績。業不題於宗器。聲靡記於彝典。而超居上禮。邈乘峻爵。靜念隆替。焦原非譬。臣以爲衆官咸事。帝謨所以式序。羣后克讓。王猷所以載穆。况臣訪德語勤。

陛下遠規唐虞永揖之典。近蒼漢魏高謝之禮。既覽金水昏明之數。又協雲雷隆替之徵。激風太上。扇采至公。聞命驚爽。心靈殞越。臣聞天地草昧。而樹之君。所以平對二儀。顯臨萬國。膺符受曆。惣明司幽。軒轅陟祈。首出庶物。顓頊登庸。作爲民紀。雖五德迭興。十代繼運。非賢非睿。莫預斯位。若乃與能之交。禪錫之會。豈伊虛薄。所可遵擬。昔傳巖佐商。秩終上公。磻溪翼周。名極列伯。臣才非半古。功愧逮聖。獄訟不往。謳歌寧歸。河乏馬圖之寶。天無乘龍之錫。元首股肱。誓不可異。而曠乘之軌。忽臻於茲。慙慨憂灼。罔識其際。伏願陛下遺舜禹之心。臣守巢由之節。則道耀日月。澤浸飛泳。聲振開闢。仁動今古。四三王而六五帝。不亦休哉。

雖瀝丹局終懼蒙咎不任銘戴匪處之情

爲始安王拜征虜將軍南兗州刺史章

絢服騰炤懋册凝芬夤對迷墜慙泣交集臣職
右南陽謝蒲鞭之政任重臨淄無遣獄之化自
分金帝闕參風尹訟璧緯裁復圭露詎淹不悟
旻靈拂采霄景汰色復交書河楚置傳江吳環
章清潤旂文肅路寵艷內維榮炫外圍方梗名
慮有陋草識冲生覩氣安以輪謝不勝荒震屏
營之情

爲始安王拜征虜將軍丹陽尹章

旣耀軒禮涵蕤龔恩爽泗覩默臣少識猶晦哀
辛方襲藉以毓采上霄搏華中漢飲惠延光偁
爵假息不悟瑤離降映繩河低文遂翊言關禁
徙第京部進憲蒙淺塵紊徒盈還迷慷慨風製
罔樹循伏憂欷滅慮焦衷不勝荷佩之情

爲建平王慶少帝登祚章

上書皇帝陛下伏承肇嗣天震雲飛璿極戎夏
歸服民靈以戴臣聞黃旗紆藻瑞益於姬帝紫

雲垂蓋効異於劉后實乃深賜天衷廣映祗迹
伏惟陛下騫英駕聖涵靈縱睿矩心明裁繩道
詰時遙裔維符雜沓河紀是以膺符寶宮輯命
珍殿誼洗雲密德徽媯夏濬發鴻原長褊偉業
方絢聲金圖騰華玉曆波滄下氓炎躔上漢臣
泐苒締寵誠兼親屏禮升之日守官楚甸不獲
勉躬儲外奉顙行間蒐泣江郊心泫京國不任
悲仰哽慰之情

爲建平王慶王太后正位章

上書王太后殿下伏承以今日淑辰曾光樞景
慶芬祗外禮蔚寰中臣聞道懋第昌業廣祉盛
藻秩攸臻憲章斯飾伏惟殿下柔明罔天夙資
龔懿芬惠翔聲端簡散譽冠采摯姪騰耀徽姒
丹陵蘊德玄丘棲聖煙熅國牒衍溢民聽涵道
席教且詠且洽臣忝任蕃園無由隨例闕廷不
勝荒情

爲建平王慶江皇后正位章

上書皇后殿下伏承以嘉月蕙時膺曜宸正翠

珩炤品。瑜組在飾。休遍函夏。譽殷靈昧。伏惟殿
下岳曜靜德。式懷謙順。升降圖傳。左右詩史。夙
鏡茂資。早摘芳訓。故以騰馥秘閨。寫問中帷。今
靈緯載升。崇正輝典。衍教紫庭。麗軌華屋。聲激
綺組。風偃家邦。黎玄湊仁。雲祗宅慶。遠邇有聞。
莫不傾渥。臣限外任。無由恭列軒屏。不勝荒情。
為蕭領軍拜侍中刺史章

上書皇帝陛下即日詔書以臣為侍中驃騎大
將軍開府儀同三司班劔三十人等持節都督

如故峻命在庭。光冊克軒。虹驂聳服。朱轡佇蓋。
夤對以懷。心影若傾。臣功乏至道。不足以題象。
魏績非振民。無可以書廟閣。半漏未晏。中鐘而
驚。實忌微庸。起乘盛服。竊疑國寵。頓萃末躬。今
寰海順典。瓊都咸光。調御惟新。鎔製就始。良宜
整變獻經。詮明典緯。九河式耀。三辰載晰。不悟
陛下皇靈曲溢。大賚斯降。而鴻賞之行。迺於臣
始。非所以騰振遙風。激昂品流。輿人之誦。具聞
其黷。頻露慊祈。未叨鑒順。今便虔禮青軒。謹躬

丹墀憂符怵惕，慙屬兼軫，不任屏營之情。

爲蕭拜太尉揚州牧章

玄文旣降，雕牒增輝，禮謁前英，寵華昔典，仰震威容，俯慙陋識，心覓戰慄，若殞若殯，臣景能驗才，無假外鏡，撰已練志，久惻內涯，故讓不飾迹，辭非謙距，寸亮尺素，頻觸瑤纊，丹情實理，備塵珠冕，而神居寂阻，九重嚴絕，徒懷漢臣伏闕之誠，曾無魯人迴日之感，所以迴懼鴻威，後奔殊令者也，旣而永鑒隆魏，緬思宏晉，國之大政，在

功與位，故治民紐亂，不處輿臺之下，去勳捨德，寧班袞司之上，咸以休對性業，裁成器靈，詎有移風變範，尅耀倫序者乎，臣績不炤朝，忠豈立國，名爵赫曦，備俛優忝，陛下久超異禮之榮，越次殊常之秩，雖寢寐矜戰，曲垂哀亮，而璽册冲正，愈賜砥礪，今便肅順天誥，恭聞睿典，審躬酌私，必跋危撓，將恐民俗，由此方擾，軌訓以之交蕪，臣豈不勉智罄忠，未知所以報奉淵聖，輸感霄極，取諸微躬，長爲慙荷。

爲蕭拜相國齊公十郡九錫章

殊命寶典、鬱降雲天、采詔綺軒、光流城禦、震驚華禮、神氣交越、臣才謝深英、氣慙遠度、進寡兵車、召陵之盟、退靡朝歌、河內之會、無束馬山戎之績、懸車流沙之功、故望寵未安、踐榮加懼、况納陛朱戶、事絕羣班、金璽綠綬、儀參鴻典、聞命屏營、以憂以墜、近申微款、日月之鑒、旣阻、方懼難慊、蘭芳之旨、愈峻、遂致百辟、卿后、踟蹰於衛闕、鑿輅旗旂、方幸於臣府、悵然遙慮、將貽厚戾、文章徒單、迄無蠲省、而天威咫尺、丹懷罔固、輒肅恭文物、翹拜榮禮、違距以深、追憎怵迫、德輶寵盛、於斯爲微、非臣鄙虛、所能酬對

符

尚書符

侍御史大夫尊冠賤履君臣斯位愛順惡逆成
敗可曉未有憑凌我江郊侵軼我河縣而不流
魂漂骨丹宗血祀者也沈攸之寂寥無聞起自
甲卒邀我百戰之軍乘彼一捷之幸鑄山裂地
紐紫要金擁旗藩伯便無北面之禮受符方屏
即有專征之釁箕賦深斂毒被南郢枉墨矯繩
害著西荆鬼怪其性故從始而遂終狼戾其志

乃泐少而得老。山陵不奔移，殃爲慶，踐祚無賀。按劔稱予，遂乃關馳逆書，亭炤妖火，此而可賒。孰不可宥。今遣陳承叔、彭文之等，敢勁三萬前驅，電躍呂安國、任侯伯、垣崇祖、曹虎頭等樓艦五萬，射蛟中流。苟元賓、郭文孝、程隱、雋等輕舸二萬，高旗蔽日，周盤龍、張文嘉、薛道淵等鐵馬五千，龍驤後陣。凡此諸帥，莫不氣薄日月，精變虹蜺，或飲羽石梁，或超踰亭樓，索鐵拔距，孤視萬旅。顧眄則前後生風，喑鳴則左右激電，然

鑿戎薄臨，驍虎百萬，六軍徐軌，五輅遲旃，丹艦發炤，素甲生波，樓煩白羽，投鞍成岳，漁陽黑騎浴鐵爲雲。於是高山與深谷共漚，紫芝與白艾同滅，不亦惜乎。符至之日，幸加三省，其驅逼寢手之人，鋒陣塢壁之主，若有投命軍門，一無所問，或能因罪立績，賞不示私，斬祛射袂，唯功是與。購募之科，具列如上，信如白水，皦然無二。臺明詳旨，飛火普加，宣下文書，千里馳驛。

[Faint bleed-through text from the reverse side of the page]

奏記

奏記南徐州新安王

伏惟明公殿下。列譽椒壁。蜚聲冲漢。爰求儒雅。
 傍招異人。削赤野之玉翦。燕山之金。至如淹者。
 東國之徒步耳。方歛影逃形。匡坐編蓬之下。遂
 遭煙露餘彩。日月末光。惟恩知泰。變色薰心。淹
 聞齊石。既撫無待。巴人之唱。柏臺已構。寧侯不
 才之木。淹幼乏鄉曲之譽。長匱芹藻之德。豈宜
 炫璞鄭氏。獻鳳楚門哉。願避職吏。緩其召書。

巡走且失。淹聞古人爲報，常有意焉。至乃一說之効，齊王動色。一劔之感，趙王解衣。孤心迴槩，有殞自天。

、、被黜爲吳興令，辭建平王牋

淹本遷徙之徒，非有儒墨之能，亦以轉命溝間，待殯巖下。誤得步修，槐循高軒，伏層檻，坐曲池，承翠河之潤，降璇日之光，載筆奉后，盛飾立朝，於山東百姓，亦已殊甚。雖蓐蝼蟻，拭黃塵，不足以塞惠，而小人狼狽，爲鬼爲蜮，山淵所容，衣劔

不貸。黥赭幽圜，皆非報責。仰遭大道之行，草木勿踐，輟鑊歛火，吹竄拾骨，濯以河漢之流，曝以秋陽之景，叢然黔首，豈不載天。竊思伏阜九載，齒錄八年，以春以秋，且恩且顧，竟不能抑黑質，揚赤文，抽精膽，報慈光，而自爲擁腫之異木，卒成踴躍之妖金，所謂孽由已作，匪降自天，猶沐浴造化餘靈，宥以遐邑，方蒙被霜露，裹糧洲島，缺鑿山楹爲室，永與鼃鼃爲羣，猶蹶者不忘起，盲者不忘視，况罪溢朔方，尚駐一等之刑。咎過朱

崖猶緩再重之施。金石無知。何以識答。昔河濟
荆吳。必獲陪從。京輔關轂。長奉帷席。德音在耳。
話言如昨。淹迺梁昌。自投東極。晨鳥不蜚。遷骨
何日。一辭城濠。旦夕就遠。白雲在天。山川問之。
眷然西顧。涕下若屑。

、、到功曹叅軍詣竟陵公子良牋

竊惟明使君。鉞下道耀神源。德鑄靈極。誕涵天
聽。資河炤聖。譽拂絃外。芳激震中。故衡梁孕秀。
璿璣流品。變瑤光之暉。贊玉燭之色。功邁翊殷。

績起匡漢。是以赤瑕瓊寶之文。睇影而覓集。青
龍遺風之乘。晞光而遠至。如民者益不足笑。所
志不出繒販。所學不遺祝筮。業異儒墨。行乖曾
史。旣乏修短之術。又慙啓塞之辨。不能伏軾蹲
衡。驚燕趙之郊。黃金橫帶。馳澠淄之幣。語默罕
緒。圓方靡樹。謬以一氣之微。傲百載之會。躬奉
英睿。身蒙青屨。故以潤厚累璧。恩重兼金。不悟
懸黎降景。靈河瀉潤。復獲執羈。蘭陳迎笏。桂序
漏越之琴。竊莊文之價。缺齧之劍。盜項襄之名。

心羞秦勝志慮楚犢抱魄踴躍憂集如熏鑄感
何日銘報焉期

[Faint bleed-through text from the reverse side of the page]

啓

爲建平王慶改號啓

竊以皇衢永謐則玉曆惟禎國慶方夷則繩澤
式茂故五鳳協年並露應號况今道潤衍溢頌
祉載繁嘉生蠲慶風雲瑞節旣觀昭晨方鑄昌
化延守一隅無以自屈不勝荒情

爲建平王讓鎮南徐州刺史啓

臣言臣誓惟殃爨頻寫曲折慊慊狂愚冀蒙哀
弔而聖旨懸嚴便賜斷表神乖意失音影何地

吞悲茹號情膽載絕臣荒昧神氣爰自幼稟分
踰鼎貴秩高外州臣乏素能或所不任况在憂
年必取黜辱特爲開非常之恩借權製之義紊
禮滅經實翦治本臣又能身祈命請一感天地
躑躅表啓心容已醜猶疑大道之行墨纒不興
孝治天下通喪獲遂陛下覆被仁明品物無漏
豈於微臣獨不蠲鑒焦鯁在躬輒復塵觸伏願
暫輟聽覽少憐苦草則臣死之日猶生之年臨
啓恍惚竟識無主不勝殞越怵息之心

爲建平王謝賜石硯等啓

臣言奉勅賜石硯及法書五卷天旨又以臣書
小進更使勤習敬閱籀篆側觀硯功張衛慙奇
金瓊羞麗臣夙乏翰能素謝篇伎空貴恩輝徒
隆慈飾方停煙墨永砥學玩仰結聖造伏銘私
荷不任下情

爲建平王謝玉環刀等啓

奉勅賜玉環刀等五種珍器缺伏蒙猥降飾
軼采朱跨影懸魄崑岡歸琛關山慙寶謹襲緹

素以克握睇垂光既深銘佩更積不任下情
、、爲蕭領軍讓司空并敦勸啓

臣某言臣公心之請丹誠以傾詔旨冲挹便賜
斷表伏聞當遣王人猥垂獎勸仰天光休俯增
驚厲中謝臣以爲槐鉉之任百王攸先具司是
屬冠冕式瞻化曜昌輝連基政務事深崇替迹
豫興衰故道富一時則風行明令才乏通權則
山摧河泣既澆汨蒼祗將紊毀身國臣進退惟
疑再三自顧實以陋情悲忘寵極但畏軼超疲

伍。迺叅鼎軸。無德而貴。豈敢偷存。才怯任重。物
所不恕。故弱識褊槩。頻布前辭。枯木朽株。永隔
蠲恕。豈特大車方塵。小雅有廢而已哉。將據致
寇之悔。取鑒於茲矣。且皇華之命。居上之鴻私。
鳳舉之招。爲下之殊榮。國勲必書。史不謬牘。况
臣連牧圉岳。董率職方。既鑠近古。垂耀中葉。揆
望揣實。爲泰已甚。而迺復降朱輪之使。方枉青
冊之勸。寤寐悃灼。諒無以任。輒重素誠。冒覬神
炤。伏願皇靈。特垂開愍。賜停正台之職。并免敦

勸之使餘所榮忝誓不敢辭肅恭外屏祈迴恩
授則於臣慊欵復爲惠造不任憂戴匪惶之情
、爲蕭太尉子姪拜領軍江州兗州豫州淮

南黃門謝啓

臣公言臣頻結崇寵亟延上爵休恩動俗烈榮
振古鴻品清飾已藹金圖秀鼎號銘共茂瑤篆
永言戚慮鑒寐殷心況乃秩洽朝門慶霑國珮
弱息臣諱嶷映晃等文不昭典武不定功出內
帷闔升降貂綬或振迹領候職贊禁錡或騰光

江甸任鈞屏翼河兗衝要旣濫北門之管淮豫
險捍又謬西偏之寄兄子臣鸞忝守近畿嫡孫
臣某載華省闈皆倏忽晷景頻煩升荷雖咸罄
愚識恪居匪替豈足以少塞神渥裁酬皇眷囂
黷一盈慙厲彌積談天之辨不能爲臣陳辭雖
龍之文無以爲臣飾愧靜然肅念裴狗交集不
任憂感沐浴之情

上書

獄中上建平王書

昔者賤臣叩心飛霜擊於燕地。庶女告天振風襲於齊臺。下官每讀其書未嘗不廢卷流涕。何者士有一定之論女有不易之行信而見疑貞而爲戮是以壯夫義士伏死而不顧者也。下官聞仁不可恃善不可依謂徒虛語乃今知之伏願大王鑿停左右小加憐察下官本蓬戶桑樞之民布衣韋帶之士還不飾詩書以驚愚進不

買名聲於天下。日者謬得升降承明之闕。出入金華之殿。何嘗不局影凝嚴。側身扃禁者乎。竊慕大王之義。復爲門下之賓。備鳴盜淺術之餘。豫三五賤伎之末。大王惠以恩光。顧以顏色。實佩荆卿黃金之賜。竊感豫讓國士之分。常欲結纓伏劔。少謝萬一。剖心摩踵。以報所天。不圖小人固陋。坐貽謫缺。迹墜昭憲。身限幽圉。履影弔心酸。鼻痛骨。下官聞虧名爲辱。虧形次之。每一念來。忽若有遺。加以涉旬月。迫季秋。天光沈陰。

左右無色。身非木石。與獄吏爲伍。此少卿所以仰天槌心。泣盡而繼之以血者也。下官雖乏鄉曲之譽。然嘗聞士君子之行矣。其上則隱於簾肆之間。臥於巖石之下。次則結綬金馬之庭。高議雲臺之上。次則虜南越之君。係單于之頸。俱啓丹冊。並圖青史。寧當爭尺寸之末。競錐刀之利哉。下官聞積毀銷金。積讒糜骨。遠則直生取疑於盜金。近則伯魚被名於不義。彼之二子。猶或如是。况在下官。焉能自免。昔上將之恥。絳侯

幽獄名臣之羞。史遷下室。至於下官。當何言哉。夫以魯連之智。辭祿而不返。接輿之賢。行歌而忘歸。子陵閉關於東越。仲蔚杜門於西秦。亦良可知也。若使下官事非其虛。罪得其實。亦當鉗口吞舌。伏七首以殞身。何以見齊魯奇節之人。燕趙德歌之士乎。方今聖曆欽明。天下樂業。青雲浮洛。榮光塞河。西泊臨洮。狄道北距。飛狐陽原。莫不浸仁沐義。昭景飲醴。而下官抱痛園門。含憤猷戶。一物之微。有足悲者。仰惟大王少垂明白。則梧丘之鬼。不愧於沈首。鵠亭之鬼。無恨於灰骨。不任肝膽之切。敬因執事以聞。此心既照。死且不朽。

此處為書寫區，但內容極其模糊，僅能辨識出一些零星的字跡，如「...且...」等。

書

與交友論隱書

淹者海濱窟穴，弋釣為伍，自度非奇力異木，不足聞見於諸侯。每承梁伯鸞臥於會稽之野，高伯達坐於華陰之山，心常慕之，而未能及也。嘗感子路之言，不拜官而仕，無青組紫綬，龜紐虎符之志，但欲史曆巫卜，為世俗賤事耳。而影然十載，竟不免衣食之敗。何則？性有所短，不可韋弦者有五：一則體本疲緩，臥不肯起；二則人間

江醴陵集

卷之一

書

一

應修。酷嬾作書。三則賓客相對。口不能言。四則性甚畏動。事絕不行。五則愚婞妄發。輒被口語。有五短而無一長。豈可處人間耶。知短而不可易者。所謂輪椎分定也。猶如雞鶩之有毛。不能得鸞鳳之光采矣。况今年已三十。白髮雜生。長夜輾轉。亂憂非一。以溘至之命。如星殞天。促光半路。不攀長意。徒自欺取。筋駑髓冷。殊多災恙。心頑質堅。偏好冥默。旣信神農服食之言。久固天竺道士之說。守清淨。煉神丹。心甚愛之。行善

業。度一世。意甚美之。今但願拾薇藿。誦詩書。樂天理性。斂骨折步。不踐過失之地耳。猶以妻孥未奪。桃李須陰。望在五畝之宅。半頃之田。鳥赴簷上。水匝階下。則請從此隱。長謝故人。若乃登峩嶠。度流沙。殮金石。讀仙經。嘗聞其驗。非今日之所言也。誰謂難知。青鳥明之。貴布筆墨。然亦焉足道哉。

報袁叔明書

僕知之矣。高臯爲別。執手未期。浮雲色曉。悵然

竟飛前辱贈書，知命僕息心越地，採藥稽山，友人幸甚。去歲迫名茂木，冬盡不獲，有報引領於邑，情詎可及。足下推僕者，不一二談也。僕聞狂士之行有三，竊嘗志之。其奇者則以紫天爲宇，環海爲池，裸身大笑，被髮行歌。其次則堅坐崩岸，僵臥深窟，朝食松屑，夜誦仙經。其下則辭榮城市，退耕巖谷，塞逕絕竇，杜牆不出。然者皆羞爲西山之餓夫，東國之黜臣，而况其鄉黨乎？或有社稷之士，入而忘歸，則爭論南宮之前，衛主

於邪，伏身北闕之下，納君於治。至乃一說之奇，驚畏左右，一劔之功，震慄鄰國。夫能者惟橫議，漢庭怒髮燕路，且猶不數，而况於鄰里乎？若僕之行止，已無可言矣。材不肖，文質無所直，徒以結髮游學，備聞士大夫言曰：在國忠，處家孝，取與廉，交友義。故拂衣於梁齊之館，抗手於楚趙之門，且十年矣。容貌不能動人，智謀不足自遠，竟慙君子之恩，卒離飢寒之禍。近親不言，左右莫教，涼秋陰陰，獨立閑館，輕塵入戶，飛鳥無迹。

命保琴書而守妻子其可得哉故國史小官也而子長爲之執戟下位也而子雲居之僕非有輕車驃騎之略交河雲險之功幸以盜竊文史之末因循卜祝之間故俛首求衣歛眉寄食耳若十口之糲去爲飢寒從疾舊里斥歸故鄉箕坐高視舉酒極望雖五侯交書羣公走幣僕亦在南山之南矣此可爲智者道難與俗士言也方今仲秋風飛平原影色水鳥立於孤洲蒼葭變於河曲寂然淵視憂心辭矣獨念賢明蚤世英華殂落僕亦何人以堪久長一旦松柏被地墳壟刺天何時復能銜杯酒者乎忽忽若狂願足下自愛也

勅爲朝賢答劉休範書

昔媯道昇昌于羽未能戢姬德昭宣長旌猶卷舒焚衣毀冕有自來矣皇宋靈武誕命聖道鬱宏三后連光四聖沓軌或經天緯地構紫靈之符調風偃海隆黃旗之祚莫不頌滿金石聲影宇宙者也暨我太宗明皇帝惟岳降聖重耀函

夏延禮壁臺訪道徂室平陽之后卷迹慙靈空
同之君歛功謝德是以彩雲祥風之瑞布獲區
中梯山棧火之俗欵徼請吏跨商軼夏洗周滌
漢道澤優徂猶不道封禪遐靈在天餘惠無泯
主上文明金相穆然玉色履壁之禎獲珪之應
著在紀歲仁浸汗河惠愛秋草想亦君之所聞
也重以先帝靈略潛通英轡遠馭受話言必忠
貞方肅之臣奉風聲必虔恭匪懈之士明時琴
瑟鼎鉉之盛且被於寧世而忽覲來書以惋以

慨君爲齊梁楚越之主鼎貴一時金玉滿堂文
馬千駟爵授湯沐冠蓋於道惟名尊崇誰與爲
雄而出言效尤吐音入戾舉旗類社志竊神禁
稱兵歛衆遂窺外關今朝無闕政頓構凌上之
節室無孽豎坐生莫大之豐鳴臬赭衣號興徒
黨王萃淵藪寧滋之甚不臧不軌不忠不義未
有若斯者也宗枝之釁遠則吳楚見禽於一壁
盤石之磔近則江荆面縛於小將成敗蘭艾之
鑿又亦君之所知也聞彼虹飲鼠舞之異早見

物徵。河北隴上之謠。已露童詠。所謂妖由人作。孽不可逃。然桓侯之患。良助寒心。今羽林黃頭。絡驛爭引。熊渠飲飛。首尾電發。伏波樓船。掩江蔽汜。渡遼甲卒。克野布隰。加以先天蓋世之略。蕩海拔山之威。任輔沛陳。羽林鷁鶻。露動龍驤。精騎風驅。然後六師雲起。九軍星連。蜺旌外江。虹艦中水。金甲映平陸。鐵馬炤長原。蹙南嶽而永慨。瞰九派而懷恐。伐罪弔民。復驗於茲。甫刑三千。唯此爲大。僕才等不羈。志瀝丹款。故奏禍福。行矣。悵然。袁楮劉蕭等疏。

論

無爲論

吾曾廻向正覺歸依福田友人勸吾仕吾志不改故著無爲論焉

有奕葉公子者聯蟬七代冠冕組望多素純黼衣繡裳負長劔而耿耿佩鳴玉而鏘鏘時遊稷下或客於梁間英雄而豹變聽利害以龍驤乃動朱履而馳寶馬振玉勒而曜金羈之無爲先生之門問曰先生智德光融嵩華無得以方其

峻道義清遠，溟海不足以喻其深，無學不窺，無事不達，容儀閒靜，言笑溫雅，至如釋迦三藏之典，李君道德之書，宣尼六藝之文，百氏兼該之術，靡不詳其津要，而採摭冲玄，煥乎若覩於鏡中，炳乎若明於掌內，余聞天地之大德曰生，何以聚人曰財，是故老聃以爲柱史，莊周以爲園吏，東方持戟而不倦，尼父執鞭而不恥，實萬古之師範，一時之高士，先生嘉遁卷迹，養德不仕，乃列子之所待，非通天下之至理，雖江海以爲

榮，實縉紳之所鄙，先生倏爾笑而應之曰：富之與貴，誰不欲哉？乃運而不通也，夫忠孝者國家之急務也，申生伍員，不得志也，懷道抱德，玄風之所尚，楊雄東方，其職未高也，其大學者，不過儒墨，亦栖栖遑遑，多有不遂也，子所引之士者，情雖欲之，志不行也，憂喜不移，其情故可爲道者也，過此已往，焉足言哉？吾聞大人降迹廣樹，慈悲破生死之樊籠，登涅槃之彼岸，闡三乘以誘物，去一相以歸真，有智者不見其去來，有心

者莫知其終始，使得湛然常住，永絕殊塗，無變無遷，長祛百慮，恬然養神，以安志爲業，欲使自天祐之，吉無不利，舒卷隨取，進退自然，遁逸無悶，幽居永貞，亦何榮乎？亦何鄙乎？子其得之，吾何失之？塵內方外，於是乎著，公子恣然而有慚德，遂巡而退。

頌

閩中草木頌十五首

有序

僕一命之微，遭萬代之幸，不能鐫心礪骨，以報所事，擢翼驥首，自致丹梯，爰乃恭承嘉惠，守職閩中，且僕生人之樂，久已盡矣，所愛兩株樹，十莖草之間耳，今所鑿處，前峻山以蔽日，後幽晦以多阻，饑餒搜索，石瀨戔戔，庭中有故池，水常決，雖無魚梁釣臺，處處可坐，而葉饒冬榮，花有夏色，茲赤縣之東南乎，何其奇異也，結莖吐秀

數千餘類心所憐者十有五族焉各為一頌以
勞蒐

金荆

江南之山連障連天既抱紫霞亦漱絳煙金荆
嘉樹涵雲宅仙媵節詎及幽意誰傳

相思

竦枝碧澗臥根石林日月斷色霧雨恒陰綠秀
八炤丹實四臨公子不至山客徒尋

豫章

伊南有材匪桂匪椒下貫金壤上籠赤霄盤薄
廣結捎瑟曾喬七年乃識非日終朝

栢欄

異木之生疑竹疑草攢叢石逕森從山道煙岫
相珍雲壑共寶不華不縹何避工巧

杉

桐梓舊麗松栝稱奇焉如茲品獨秀青崖羣木
歛望雜草不窺長入煙氣永參鸞螭

檉

木貴冬榮，檉實寒色。停黛峰頂，插翠石側。碧葉
菴藹，頽柯翕絕。方陋筠檟，遠笑荆棘。

楊梅

寶跨荔枝，芳軼木蘭。懷藥挺實，涵黃糝丹。鏡日
繡壑，炤霞綺巒。爲我羽翼，委君玉盤。

山桃

惟園有實，惟山有叢。丹蘄驚露，紫榮繞風。引霧
如電，映煙成虹。伊春之秀，乃華之宗。

石榴

美木艷樹，誰望誰待。縹葉翠萼，紅華絳采。炤列
泉石，芬披山海。奇麗不移，霜雪空改。

木蓮

迸采泉壑，騰光淵丘。緗麗碧巖，紅艷桂洲。山人
結侶，靈俗共遊。時至不採，爲子淹留。

石菖蒲

藥實靈品，爰乃輔性。却痾衛福，蠲邪養正。縹色
外妍，金光內映。草經所珍，仙圖是詠。

黃蓮

黃連上草丹砂之次禦孽辟妖長靈久視驂龍
行天馴鳳匝地鴻飛以儀順道則利

薯蕷

華不可炫葉非足憐微根儻餌棄劍爲仙黃金
共壽青鱗爭年君謂無妄我驗衡山

杜若

山中杜若嘉爾翠質不奇不俗載華載實同銜
夕露共炯朝日夷陂無二沈冥如一

藿香

桂以過列麝以太芬摧阻天壽天折人文詎及
藿香微馥微薰攝靈百仞養氣青霏

讚

銅劍讚

有序

永明初始造舊宮鑿東北之地皆平岡迤隴尤
多古冢墓有人得銅劍長尺五寸余既借看歎
其古異客有謂余曰古時乃以銅爲兵乎其可
得而聞不余笑而應曰此證據甚多殆不俟言
卿旣欲知輒具言之余按山海經曰昆吾之山
其上多赤銅郭璞注曰此山出金如火以之切
玉如割泥也周穆王時西戎獻之尸子所謂昆

吾之劍也。越絕書曰：赤瑾之山，破而出錫，若邪之谿，涸而出銅。歐冶鑄以爲純鉤之劍。又汲冢中得一銅劍，長三尺五，及今所記于將者，亦皆非鐵。明古者以銅錫爲兵器也。周書稱穆王時征犬戎，得昆吾之劍，火浣布，長尺有咫。又有鍊銅赤刀，割玉如泥焉。又左傳僖公十八年，鄭伯始朝于楚，楚賜之金，旣而悔之，盟曰：無以鑄兵，故以鑄三鐘。杜預注云：楚金利故也。古者以銅爲兵，故禹貢云：荊揚貢金三品。余以爲古者語

質而難解。今者語文而易了。獨詩云：元龜象齒，其實象牙也。書云：厥包橘柚，乃黃柑也。金品上則黃，中則赤，下則黑。黑金是鐵，赤金是銅，黃金是金。黃金可爲寶，赤金可爲兵，黑金可爲器。韓子稱昔智伯繇之伐趙襄子，初晉陽襄子金將盡，問於張孟談。孟談對曰：吾聞董安于治晉陽也，公室悉以銅爲柱質，君可發而用之。於是發之，有餘金矣。謂此據蓋可知焉。又昔夏后氏使九牧貢金，鑄九鼎於荆山之下，于昆吾氏之墟。

白若甘攬之地。圖其山川奇怪，以形于鼎，使民知神姦，不逢其害，以定其祥。鼎成三足而方，不炊而自沸，不昇而自藏，不遷而自行。九鼎既成，定之國都，桀有昏德，鼎遷於商。殷紂暴虐，鼎遷於周。每人主休明，鼎雖小而重，其姦回昏亂，雖大而輕。及周顯王三十二年，姬德大衰，乃淪入泗水。秦始皇之初，見于彭城。二十七年，始皇東遊，大發徒出之，而不能得焉。後漢武帝賓禮百神于汾陰，得大鼎，時人以為九鼎，其祥不可得。

而審也。且荆軻刺秦王之日，七首擊銅柱，銅柱火出，則古者非直以銅為七首，亦以為殿柱也。且始皇之世，長狄十二，見於臨洮，身長三丈，足跡六尺。於是始皇歛天下之兵，鑄而象之，故西京賦云：高門有閔，列坐金狄是也。又造阿房之宮，其門悉用磁石，磁石喻鐵，以防外兵之入焉。以此推之，明知春秋迄于戰國，戰國至于秦時，攻爭紛亂，兵革互興，銅既不克給，故以鐵足之。鑄銅既難，求鐵甚易，是故銅兵轉少，鐵兵轉多。

年甚一年，歲甚一歲，漸染流遷，遂成風俗，所以鐵工比肩，而銅工稍絕。二漢之世，逾見其微，及漢建安二十四年，魏文帝爲太子時，鑄三寶刀，二七首，天下百鍊之精利，而悉是鑄鐵，不能復鑄銅矣。按張華博物志，亦稱鑄銅之工，不復可得，唯蜀地羌中，時有解者，由此言之，斯妙久絕。余謂不復能鑄銅者，正當不能使利如霜雪，光如雲霞，陸斬犀兕，水斷蛟龍，豈復不能鑄銅鑪，錠燈耶？然今太極殿前兩大銅鏡，卽周景王鑄

也，製作精巧，獨絕晚世，今之作必不及古，猶今鏡不及古鏡。今鐘不及古鐘矣。昔余爲吳興令，鑿池，又獲銅箭鏑數十枚，時有人復於彼山中伐木，得銅斧一口，古銅鑄爲兵，豈爲一據，故備言其詳，以發子之蒙矣。古貴銅賤鐵，非獨此事。按皇覽帝王冢墓記，稱吳王闔閭冢銅槨三重，永池六尺，玉鳧之流，扁諸之劍，三盤，郢魚腸之劍在焉。秦始皇冢亦以銅槨，水銀爲江河，關東賊發之，至銅槨而取銅，深大不可多得，因此穴

塞漢思王家時奢侈皆生葬取愛幸奴婢蓄穀爲銅窓以通殉葬者氣息兼以水火守冢給呼召數十年乃不復聞聲矣晚世之葬無復此例然猶自大奢大富大盛或傾一國之財或竭一家之寶或爭爲宏麗或競相高尚前漢奢于後漢魏時富于晉世中原旣夷至於江左時天下凋喪制度日衰富貴之家猶或厚葬然論古論曩亦減損千萬倍矣世愈貧狹哀禮愈薄又往古之事棺皆不用釘悉用細腰其細腰之法

長七寸廣三寸厚二寸五分狀如木秤兩頭大而中央小仍鑿棺際而安之因普漆其外一棺凡用細腰五十四枚大略如此亦可謂至巧矣其法旣絕亦有銅釘銅釘之體皆如今柘釘形也銅釘旣滑多被發掘自義熙以來乃以柘伐銅爰及明罷之屬亦多減省必不得已乃用烏牙焉相與皆用素棺不得施漆及自棺之外一無所設旣由貧富之懸兼以避患之及耳故爲此讚以明古今銅鐵之兵刃葬送之事焉乃成

讚曰

悠悠開闢或聖或賢蚩尤鑄銅為兵幾年天生
五才實此為先既古既曩誰測誰傳紛綸百代
事無不異况迺金鐵國之利器風胡專精歐冶
妙思於管則出於今則秘聞之釋經萬物澹薄
在古必厚在今必惡徒侈徒異徒鏟徒削聊舉
一槩以明鴻略

雲山讚四首

有序

壁上有禱畫皆作山水好勢仙者五六雲氣

生焉悵然會意題為小讚云

王太子

子喬好輕舉不待鍊銀丹控鶴去窈窕學鳳對
嶺岫山無一春草谷有千年蘭雲衣不躑躅龍
駕何時還

陰長生

陰君惜靈骨珪碧詎為寶日夜名山側果得金
丹道憂傷永不至光顏如碧草若渡西海時致
意三青鳥

白雲

紫煙世不覲，赤鱗庖所捐。白雲亦海外，益益起三山。蕭瑟玉池上，容裔帝臺前。欲知青都裏，乘此乃登天。

秦女

青琴既曠世，綠珠亦絕羣。猶不及秦女，十五乘綵雲。璧質人不見，瓊光俗詎聞。願使洛靈往，爲我道奇芬。

誄

齊太祖高皇帝誄

日月鬱華，風雲黯色。傷動紫微，悲匝璇極。嗚呼哀哉。粵夏四月辛卯，將遷座于泰安陵。龍鑿既整，羽衛以陳。深酸舊物，掩咽故臣。嗣皇帝永訣丹掖，叫號青墀。攀神光之一絕，勸遠邇之何期。弓劍有慕，纂德寫辭。僉曰：若稽古聖，睿圖靈鏡。星驅發祥，電光啓命。誕惟弱齡，惠志聰情。如金如璧，爰秀爰英。於鑠冠歲，騰華流藝。允文允武。

克明克睿，聿尚登學。嚴道尊師，宣敷五禮。優游六詩，上炫舊滯。旁鏡前疑，才罄艷采。筆盡麗辭，在友斯悌。于親伊孝，儉泰共色。夷阻一貌，遊情駟矩。縱心蹈教，鄉術式慕。州閭是效，業優登仕。先哲攸懋，矧乃寥廓。淵規邃構，官府天地。舟輿宇宙，龍靜鳳戢。歛奇揜秀，昔在帝劉。王室放命，狡焉僞誕。晦朔陵正，鋒車北軼。燿火南盛，太祖時乘。爰茲發迹，塞井滅勳。夷竈龕敵，賞鏤王圖。功蕤帝冊，乃厲中葉。天未斂難，兵百袁曹。禍十

楚漢吳地，前崩越壤。首亂街號，燿盛火列。金斷聚甲如陵，獻俘爲觀。非楚倔强，曾未屈膝。雲屯被野，魚麗亘日。廟勇旣消，國圖方匱。神冊天開，雄略世出。凶劍鱗沈，醜戈羽逸。隻騎不還，跨輪無匹。厥庸戾止，離珮委他。榮鬱閶闔，寵重山河。皇彝有文，朝采方藹。頻煩金紐，左右緹蓋。毗戎肅禁，參輦侍旆。譽馥區中，道夔氓外。河濟國險，淮泗邦塵。要藩重設，匪賢則親。亦旣推輶，擁土庇民。聲稜絕俗，威瞻殊隣。宋主陵遐，紫殿遏密。

話言之詔，貽在英粹。寅亮大寶，敷綸妙秘。世識
機鑒，物宗淵懿。無復匪鍊，靡輿不洎。三階旣馴，
五精惟至。彭蠡九江，地盡襟製。亦有劉範，衣纓
是絕。躍馬山岫，泛舟河澨。縞鏑星流，紅旗電結。
鳩翼競扇，豺牙爭礪。禍纏紫禁，兵交丹衛。瑤祀
若旂，金宸如綴。朝野傾儀，咸歸上德。實賴至公，
瀉家提國。懷險實泰，危亡必克。機筵朝旦，功定
曛黑。妙物更配，具章重則。深居撝外，遙棲縣默。
高秩方臻，元禮有序。王曰念哉，輝寵是與。職褒

宮閣，任卷文武。飾華麗貂，縈金疊組。宏猷溢俗，
曾芬冠古。憬彼朱方，亦惟宗秩。陰圖食鼎，潛謀
貫日。征輪未誓，偏旗銜律。原燎旣寂，世囂伊謐。
爰崇爰貴，以望以實。鴈縣告靜，象郡無虞。杳鬱
遠域，清麗瓊都。國填氓負，朝委事虛。實翳哲相，
嶽曜神居。功美旣損，道富去益。再紐契訓，重匡
禹迹。方同范張，濯情汾射。散簪山郊，解珮松石。
頽霞拂朝，蒼煙憚夕。韻屬玄經，恩流金液。靈厭
霸德，少帝告黷。滅慈滅養，抵仁抵信。枉獄炎鑪，

淫刑霜刃、剗忠翦義、樊稚斲觀、慄慄萬氓、曰怨
曰震、妖蜺將崩、災裂昊蒼、况乃鼎國、資滌資匡、
臨朝闡命、遏昏立綱、事繇毗漢、義締翼商、旣綏
地職、亦懋天工、權輿典緯、俾作司空、黼黻珣戈、
祐宇升庸、徒賜先袞、爰永渥冲、實曰驟騎、卷迹
辭功、寰寓睦政、畿甸綸風、沈氏滔天、勃逆舊楚、
氣蹂黃池、志輒柏舉、裂禮紊度、毀經棄序、黑騎
黔山、朱旗頽渚、短兵相接、長鎗爲群、顛如海岸、
蠹似蒸雲、合乃霧激、離則霰分、荆國旣軼、郢縣

方焚、袁劉二戾、焱馳煒發、聯謀制外、儲兵襲內、
釁激瓊殿、勢崩金闕、志乘玄璽、圖矯秘鉞、鴻妖
逝星、高禔棄月、惟時諸侯、上脫下競、圖服淆蕩、
實綴仁聖、輝耀國靈、導揚主命、曾規近晰、深暮
遠鏡、左輪朱頰、表裏斯定、七德飾歌、九功絳詠、
乃陟上鉉、寵文方輝、誕錫有秩、綵吹旌旗、贊政
瑤光、翊教太微、實曰太傅、爰登相國、緝民以禮、
綜祗以德、景福咸湊、芳猷允塞、羽泳式造、絃縣
是則金湯無險、軌書攸同、迴迴寵迹、窈窈睿功、

寶珪黛壤，俾王于東。絢冊是敷，懋物既崇。設業
設簾，丹懸碧鏞。於穆顯相，黎元時邕。冰州炎獫，
來獻其琛。鴈海龍關，亦柔好音。梁龜棧巖，越險
浮深。遠戎皆覲，上靈必臨。山吐石青，野降寶露。
瑞芝麗草，珍柯爛樹。人崩俗締，玄緯幽數。睠此
妙德，跋我王度。遙滯炎旻，既變至公。萎蕤媯華，
文祖受終。大宋有訓，高撫萬邦。容豫慶雲，遊衍
南風。正服寶位，圓光玉繩。御繡懷古，負黼夙興。
丘礙必靜，淵漪咸澄。勛宸有作，黔牖其義。矜卑

廣慈，合賤兼愛。綴機剋賊，輕章削罰。迹去繁多，
情歸素一。軒靡龍刻，楹無丹密。越賤申椒，楚輟
靈橘。陵寢起邑，池藻誰縣。遙館罕御，離房空薦。
停教路宮，淹神正殿。斟酌信義，左右律禮。瑩彼
皇維，燁茲國體。冑業既樹，璧流方啟。漢求金岫，
吳寶銅塹。寧若睿德，讓駟却劍。實才爲貴，唯功
是念。火職咸允，雲官亦熙。既臯乃益，匪稷伊夔。
無舛巡風，寧埃辯詩。玉燭調文，玄英最節。乘山
呈瑞，航海歸闕。不曠景冊，靡空歲月。受緯機衡。

兼甄詩史孫韓各辨莊墨異理昭政往藹洗鑠
前軌逍遙星斗徙倚涼雲春飈方舞秋鴻初分
式謠式詠載績載文邈哉我后淪泳賢聖罄品
作號盡物歸政蒼黎汰歡玄靈刷慶永戩嘉祉
方寅景命締詳有文颺沛將掩理昧人詖道懸
世險夔略遺圖忌華狗儉文闇陳几翌明告漸
蜺僑鬪食日月朏精矧在乘輿宇折宙傾稜纏
鸞掖悲赴紫扃去璇臺之照襲珠殯之冥嗚呼
哀哉惟宮低景輦路巖光側柏門之黯黯泣松

帳之茫茫上宮擗而詔御咽群后慕而侍衛傷
攢靈旣儼遠日以筮鬱鬯旣奠龍酌方撤素月
夜橫翠煙曉結縱虛金而下歛吟空簫而增絕
嗚呼哀哉於是颯天駕而從綺輿澁神行而撫
文輦傍建春而南蹕徑宜陽而東踐尚蓋蓋而
未散乍眇默而不轉睇千乘之共啜盼萬騎之
相泫悲魏后之戀譙惻漢主之懷沛辭金陵之
隄義降雲陽之杳藹風奇響而駐軒煙異色而
低旆怨街邑之綵驂弔原野之縞蓋挽夫愴而

征馬凝痛縈盈其如帶嗚呼哀哉復林油雲重
山減日御房清妻神路冥謐昭徒肅燾幽祇竦
蹕攀光灑慟臨泉澍泗瓌座長嚴雕宮永閔寂
帳寂兮寂已遠夜釭夜兮夜何遠嗚呼哀哉

傳

袁叔明傳

友人袁炳字叔明陳郡陽夏人其人天下之士
幼有異才學無不覽文章倣儻清瞻出一時任
心觀書不爲章句之學其篤行則信義惠和意
馨如也常念蔭松柏詠詩書志氣跌宕不與俗
人交俛眉暫仕歷國常侍員外郎府功曹臨湘
令粟之入者悉散以贍親其爲節也如此數百
年未有此人焉至乃好妙賞文獨絕於世也又

撰晉史奇功未遂不幸卒宮春秋二十有八與余有青雲之交非直銜杯酒而已嗟乎斯才也斯命也天之報施善人何如哉何如哉

自序傳

淹字文通濟陽考城人幼傳家業六歲能屬詩十三而孤邈過庭之訓長遂博覽群書不事章句之學頗留精於文章所誦詠者蓋二十萬言而愛奇尚異深沉有遠識常慕司馬長卿梁伯鸞之徒然未能悉行也所與神遊者唯陳留袁

叔明而已弱冠以五經授宋始安王劉子真略傳大義爲南徐州新安王從事奉朝請始安之薨也建平王劉景素聞風而悅待以布衣之禮然少年嘗倜儻不俗或爲世士所嫉遂誣淹以受金者將及抵罪乃上書見意而免焉尋舉南徐州桂陽王秀才對策上策轉巴陵王左常侍右軍建平王主簿賓待累年雅以文章見遇而宋末多阻宗室有憂生之難王初欲羽檄徵天下兵以求一旦之幸淹嘗從容曉諫言人事之

成敗。每曰：殿下不求宗廟之安，如信左右之計，則復見麋鹿，霜棲露宿於姑蘇之臺矣。終不以納而更疑焉。及王移鎮朱方也，又爲鎮軍參軍事，領東海郡丞。於是王與不逞之徒，日夜構議，淹知禍機之將發，又賦詩十五首，略明性命之理，因以爲諷。王遂不悟，乃憑怒而黜之，爲建安吳興令。地在東南嶠外，閩越之舊境也。爰有碧水丹山，珍木靈草，皆淹平生所至愛，不覺行路之遠矣。山中無事，與道書爲偶，乃悠然獨往，或

日夕忘歸。放浪之際，頗著文章自娛。在邑三載，朱方竟敗焉。復還京師，值世道已昏，守志閑居，不交當軸之士。俄皇帝始有大功於四海，聞而訪召之，爲尚書駕部郎，驃騎竟陵公參軍事。當沈攸之起兵西楚也，人懷危懼，高帝嘗顧而問之曰：天下紛紛若是，君謂如何？淹對曰：昔項強而劉弱，袁衆而曹寡，羽號令諸侯，竟受一劍之辱，紹跨躡四州，終爲奔北之虜。此所謂在德不在鼎。公何疑焉？帝曰：聞此言者多矣，其試爲我

言之。淹曰：公雄武有奇略，一勝也；寬容而仁恕，二勝也；賢能畢力，三勝也；民望所歸，四勝也；奉天子而伐逆叛，五勝也。攸之志銳而器小，一敗也；有威而無恩，二敗也；士卒解體，三敗也；搢紳不懷，四敗也；懸兵數千里而無同惡相濟，五敗也。故豺狼十萬，而終爲我獲焉。帝笑曰：君談過矣。是時軍書表記，皆爲草具。逮東霸城府，猶掌筆翰，相府始置，仍爲記室參軍事。及讓齊王九錫備物，凡諸文表，皆淹爲之。受禪之後，又爲驃

騎豫章王記室參軍，鎮東武令參掌詔冊，並與國史。旣非雅好，辭不獲命，尋遷正員散騎侍郎中書侍郎。淹嘗云：人生當適性爲樂，安能精意苦力，求身後之名哉？故自少及長，未嘗著書，惟集十卷，謂如此足矣。重以學不爲人，交不苟合。又深信天竺緣果之文，偏好老氏清淨之術。仕所望不過諸卿二千石，有耕織伏獵之資，則隱矣。常願幽居築宇，絕棄人事，苑以丹林，池以綠水。左倚郊甸，右帶瀛澤，青春爰謝，則接武平臯。

素秋澄景。則獨酌虛室。侍姬三四。趙女數人。不
則逍遙經紀。彈琴詠詩。朝露幾間。忽忘老之將
至。淹之所學。盡此而已矣。

墓銘

宋尚書左丞孫緬墓銘

光靈維周。肇祀伊衡。炤分上代。鏡華中世。睿誕
降明。秀芳嗣烈。學惟物範。行實士節。容與書林。
優遊史藝。素巾俄冠。朱紱累轍。來訪詩逸。入詢
禮缺。麗名文質。齊影儒喆。慶履匪舒。沴氣遽結。
殯帷兮既晦。泉火兮已閉。駿遺波於遙緒。颯流
馨於遠歲。

宋安成王右常侍劉喬墓銘

丹陽韞聖、豐鄉降賢、玉葉旣積、金徽方傳、乃毓伊人、尅廣克宣、騰芬中屬、飛藻上年、杳杳虛素、永永冲關、雲意霜拍、瓊立冰堅、家寶以瑩、國才未甄、參錯報善、茫昧雲玄、歛蒐幽石、委氣空山、膚若流波、身如絕煙、芳霏一逝、美懋徒鐫、

宋光祿大夫孫夏墓銘

川祗効鏡、岳祥獻明、碧葉獨秀、瑤源自清、幼炳器譽、夙耀才名、體兼遷雲、學備儒史、紫閣咸趨、朱軒旣履、貴交慕塵、素遊企軌、騰藻上京、振彩下國、如彼綠蘭、秉芬四塞、歛人逕之不平、歎天路之冥默、貴夫君之爲美、播靈均與正則、

齊御史中丞孫詵墓銘

筠以霜靄、蘭以風薰、深哉若人、實好斯文、系緒承胄、激藹驚芬、才基魏粲、學參漢雲、覽志上載、洽鏡前聞、騰名冠俗、揚采絕群、方駟明世、式贊睿君、如何不淑、天道難分、敢雕窆石、永晰幽墳、
齊司徒右長史檀超墓銘

惟金有銑、惟玉有瑤、君實淵哉、行爲世標、高志

洒落逸氣寂寥奧學內溢深文外昭嘉禾籍譽
登國振朝亦既有美筠傷蕙凋人邇運曠世促
道遼永矣仁矣流芳無澆

行狀

、建平王太妃周氏行狀

竊聞侯服之譽非黃冠能敷玉食之門寧皂衣
所述諒畏褒虛美於君后被空名於鼎貴然有
漢臣誅行晉史書德者亦云實而已焉伏見國
太妃稟靈惟岳集慶自遠世擅淮汝族冠疇代
故以載曜聲書式炳滕牒矣太妃誕異離之正
和函雲露之中氣凝采齧歲賁章笄年若迺彤
管女圖之學纂組綺縞之工升降處謙之儀柔

靜居順之節莫不中道若性不嚴而成故譽滿
闈闕聲聞軒殿以元嘉某年歸於故司徒宣簡
王既而第高恒倫秩踰外品青軒華轂用光國
輝素壁丹墀實隆家貴具惟姻娣靡不式瞻而
居尊以簡訓卑以弘躬謹蘭閨身撝椒第若衛
娥之炯行樊羸之英操方之蔑如也大明二年
宣簡王薨太妃藉悲用禮撫孤用慈柔懿之德
愈彰肅敬之問日被雖文伯之母言不踰闕莒
相之主行存乎勤無以過也大明某年拜建平

王太妃是時今王春秋方富德業未隆藉茲金
響終能玉播故綺襦出宰弱冠升朝者亦太妃
劬勞之訓也謂天蓋高降年不永以太豫元年
二月三日薨于荊州之內寢凡厥遠邇以哀以
歎今祖行有期泉窆無遠素旂望路綵旌思歸
所以垂宣徽容髣髴金石者謹詳牒行狀具以
申言

文

蕭太傅東耕祝文

敬祝先穡曰、攝提方春、黍稷未華、灼爍發雲、昭
耀開霞、地煦景暖、山艷水波、側聞農政、實惟民
天、競拒獻歲、務畎上年、有滄疏潤、與雨導泉、崇
耕巡索、均逸共勞、命彼倌人、稅于青臯、羽旗銜
旄、雄戟耀毫、呈典緇耦、獻禮翠壇、宜民宜稼、克
降祈年、願靈之降、解珮停鑿、神之行兮、氣爲輶
神之坐兮、煙爲蓋、使嘉穀與玄鬯、永爭光而無

沫哉

蕭驃騎祭石頭戰亡文

咸告忠貞之魂曰義為行首雄實士節嗟爾驍
驚稟才蹈烈守玉不渝懷冰可折氣彰靡旗情
皦亂轍高墉摧堅巨醜挫銳深痛克矜寃靈及
雪隆恩殊悼臨爾以歆千秋同盡百齡一世竟
而有知咸無遠邇嗚呼哀哉

江醜陵集

卷一

蕭驃騎祭石頭戰亡文

